

AUGLÝSING

um staðfestingu á verklagsreglum Bændasamtaka Íslands um framkvæmd úttekta vegna framlaga til jarðræktar og hreinsunar affallsskurða.

Með vísan til 3. mgr. 6. gr. samnings um verkefni samkvæmt búnaðarlögum, nr. 70/1998 og framlög til þeirra á árunum 2013-2017, dagsett 28. september 2012 sbr. gr. 6.4 í samningi um starfsskilyrði mjólkurframleiðslu, dagsett 10. maí 2004, með síðari breytingum, og gr. 4.5 í samningi um starfsskilyrði sauðfjárræktar, dagsett 25. janúar 2007, með síðari breytingum, hefur sjávarútvegs- og landbúnaðarráðherra staðfest verklagsreglur Bændasamtaka Íslands um framkvæmd úttekta vegna framlaga til jarðræktar og hreinsunar affallsskurða. Reglurnar eru birtar sem fylgiskjal með auglýsingu þessari.

Atvinnuvega- og nýsköpunarráðuneytinu, 22. júlí 2013.

F. h. sjávarútvegs- og landbúnaðarráðherra,
Ólafur Friðriksson.

Rebekka Hilmarsdóttir.

Fylgiskjal.

VERKLAGSREGLUR

um framkvæmd úttekta vegna framlaga til jarðræktar og hreinsunar affallsskurða.

1. gr.

Reglur þessar fjalla um framkvæmd úttekta vegna framlaga til jarðræktar og hreinsunar affallsskurða, skv. 5. gr. samnings um verkefni samkvæmt búnaðarlögum, nr. 70/1998 og framlög til þeirra á árunum 2013 til 2017, dagsett 28. september 2012.

Um framlögin sem slík gilda reglur um framlög til jarðræktar og hreinsunar affallsskurða.

Við framkvæmd þessara reglna skal leitast við að ná markmiðum ofangreindra samninga.

2. gr.

Til að standast úttekt vegna jarðræktar þarf að liggja fyrir fullnægjandi túnkort af ræktarlandinu, t.d. úr túnkortagrunni Bændasamtaka Íslands. Túnkortið á að sýna það land sem er grundvöllur að styrkumsókn. Vanda skal til verka þegar ræktunarspildurnar eru hnitaðar inn í þar til gerðan kortagrunn. Kortið skal teiknað í að lágmarki mælikvarðanum 1:3000. Þegar ræktað er aðeins í hluta af túni sem hægt er að vísa í á túnkorti og/eða þegar um nýbrotið land er að ræða sem ekki er til mælt á túnkorti, ber umsækjanda að framvísa fullnægjandi túnkorti sem afmarkar ræktunina.

Þegar metið er hvort túnkort er fullnægjandi skal byggja það mat á því hvort fagaðili hafi teiknað og mælt viðkomandi ræktun. Fullnægjandi túnkort er t.d. ekki loftmynd, með áteiknuðum (óprentuðum) útlínum án útreiknaðrar stærðar. Berist umsókn með ófullnægjandi túnkorti skal úttektaraðili upplýsa umsækjanda um það eins skjótt og kostur er og benda viðkomandi á hvar hann getur aflað fullnægjandi túnkorts.

Úttektaraðili sannreynir stærð ræktunar og hvort skilyrði til styrkveitingar eru að öðru leyti uppfyllt. Heimilt er að vettvangsúttekt á ræktarlandi fari einungis fram með tilviljunarkenndu úrtaki, óháð umfangi ræktunar. Uppskera er kvöð.

Styrkhæf ræktun er ræktun grass, korntegunda til dýrafóðurs og manneldis, ræktun olíujurta, þar með talin til lífdíselolíuframleiðslu enda sé hratið nýtt til fóðurs, ræktun græn fóðurs til beitar og uppskeru á því ári sem uppskorið er. Beit búpenings telst vera uppskera sem og nýting kornhálms. Ræktun vetraryrkja sem sáð er um mitt sumar og endurræktun túna er tekin út á uppskeruári. Óstyrkhæf ræktun er kornrækt sem eingöngu er ætluð til að draga að gæsir til skotveiði og önnur ræktun sem ekki er nýttjuð til búskapar, þar með talin sáning í golfvelli, tjaldstæði o.s.frv.

3. gr.

Til að standast úttekt vegna hreinsunar affallsskurða þarf að liggja fyrir fullnægjandi kort yfir skurði sem sótt er um styrk til að hreinsa. Kortið skal sýna þá skurði sem eru grundvöllur að styrkumsókn. Vanda skal til verka þegar skurðirnir eru hnitaðir inn í þar til gerðan kortagrunn. Kortið skal sýna með fullnægjandi hætti lengd og breidd skurðanna. Greitt er út á hundruð metra og venjulegar reglur um upphækkanir gilda. Framlög má aðeins veita ef heildarlengd er a.m.k. 100 metrar. Breidd skurðanna skal minnst vera 6 metrar að ofan.

Úttektaraðili sannreynir stærð, lengd og breidd skurðar og hvort skilyrði til styrkveitingar eru að öðru leyti uppfyllt. Heimilt er að vettvangsúttekt á skurðum fari einungis fram með tilviljunarkenndu úrtaki, óháð umfangi.

4. gr.

Ár hvert auglýsa Bændasamtök Íslands, t.d. í Bændablaðinu, eftir umsækjendum um framlög vegna jarðræktar og hreinsunar á affallsskurðum. Umsóknum skal skilað á skrifstofu Bændasamtaka Íslands á sérstökum eyðublöðum sem samtökin láta í té, eða á rafrænu formi, eigi síðar en 10. september ár hvert vegna framkvæmda á árinu.

Allar umsóknir og úttektir skulu skráðar í þar til gerðan gagnagrunn. Einnig skulu allar úttektir skráðar og hnitsettar í túnkortagrunn Bændasamtaka Íslands. Skrá skal upplýsingar um ræktunina eins nákvæmlega og unnt er, m.a. tegundir og yrki, ræktunarár, landnúmer þess lands þar sem ræktunin á sér stað og búsnúmer umsækjandans.

Úttektaraðili skal vera starfsmaður búnaðarsambands eða leiðbeiningarmiðstöðvar sem hefur almenna þekkingu á viðkomandi sviði. Sá má ekki gera úttektir á jarðrækt eða skurðum sem hefur leiðbeint um ræktun eða hreinsun skurðanna.

5. gr.

Úttektum skal að jafnaði vera lokið fyrir 15. nóvember ár hvert. Úttektir á framkvæmdum skulu berast Bændasamtökum Íslands fyrir 15. nóvember á sama ári eftir að umsókn berst og skulu styrkir greiddir fyrir árslok.

6. gr.

Verklagsreglur þessar eru settar skv. 6. gr. samnings um verkefni samkvæmt búnaðarlögum, nr. 70/1998, og framlög til þeirra á árunum 2013 til 2017, dags. 28. september 2012.

Reglurnar öðlast gildi að fenginni staðfestingu atvinnuvega- og nýsköpunarráðherra og gildistími þeirra er sá sami og framangreindra samninga.

Ákvæði til bráðabirgða.

Vegna kalskemmda vorið 2013 skal úttekt fara fram fyrir 15. nóvember 2013. Uppskera er ekki kvöð en sáningu og frágangi þarf að vera lokið. Að öðru leyti gilda ákvæði verklagsreglna um framkvæmd úttekta vegna framlaga til jarðræktar og hreinsunar affallsskurða.

Reykjavík, 19. júlí 2013.

F.h. Bændasamtaka Íslands,

Eiríkur Blöndal.